

四庫全書

集部

欽定四庫全書

文苑英華卷三十四

宋 李昉等 編

水三

海重潤賦一首

海水不揚波賦一首

江漢朝宗賦一首

衆水歸海賦一首

襄華貫洪河賦一首

三門賦一首

渭水象天河賦一首

清濟貫濁河賦二首

渭水貫都賦一首

涇渭合流賦一首

海重潤賦

梁洽

道之應物兮，小大咸信。物之感道兮，禎祥必順。况我儲君元膺在震，乾乾夕惕。兢兢日慎，德澤潤於生靈。滄海得無重潤，惟海之量百川。朝宗猶君之美，萬國向風。朝宗者歸其廣，向風者欽其政。既同類以相求，故重潤而必應。是使日光分色，山輝度映。風雨不淫，魚龍遂性。羣眎仰止，是燔瘞以告成。外國聞焉，願梯航而來聘。然則我君之明兩也，景毓前星。休徵夢月，主鬯之功。昭著牽

衣之智逸發四皓既親三朝不闕故曰惟其有之是以似之海則靈潮晨夜而無替君惟順動溫清而有時詳夫海之爲器也吞吸八裔流不逆細恠必思蓄珍無不麗沖融盡汨膠輶澎濤飛濤疊躍於秋陰白浪翻光於春霽雖則沙石混濁不蕩其清波瀾迅委終復於平惟此之故彰我君明至矣哉靈海之潤孰知其極願乘桴以攸徃非引蠡而能測道未行兮竊喜取材敢獻賦兮揚君之德

海水不揚波賦

以平上去入
倒用爲韻

石岑

太極立天地，䟽嶽瀆所以鎮。四維橫九服，伊海之爲德。
有王之法象，故量納羣川。而道適百谷，功配乾絡。運迴
坤軸，氣蒸混於灝元。潮動襄乎山陸，示懲惡則鼓怒。見
夫羣恠將瑞，聖則不波。介以景福，唐興百三十有四載。
湛恩溢乎荒外，倬五聖之在天。奄六合而成大赫，吾君
之光贊敷至道。而允泰政符純德，昭千古而惟新。澤體
上仁同萬類，而咸賴八狄窮陬。而盡歡九夷無遠，而不

會則成周之德未足雙越裳之來今至再是以四海盡
鏡九瀛涵影寫合璧之祥光湛連珠之瑞景德侔上善
洗物而容潔道本玄元澄心而體靜湛兮恒清晏兮砥
平泊乎無情蕩乎難名如君之道酌焉而不竭象君之
德注焉而不盈所謂皇得一則政能貞海得一則波不
驚恍兮惚兮其中有物杳兮冥兮其中有精精罔竒而
不育物無大而不成鯤將化鵬欲征蚌且剖珠其明誰
能一借扶搖便爲君御之貢王城

江漢朝宗賦

以百川會流必歸於海爲韻

樊陽源

江漢之流始滔滔乎楚澤雖導源而則異必朝宗而來
格故能吞別派而且千壅細流而累百初謂發岷山之
濺濺出嶓冢而涓涓忽洑至以盈坎遂同歸於巨川洋
洋不窮驅迅波以來注浩浩何足走驚浪而方前沸渭
迸瀨崩奔爭會過東陵而更長歷南國而彌大引汲清
濁并包吠澮始逶迤於域中終委輸於區外雙流淼淼
並驚悠悠瀉汗乎萬里經營乎數州靜委極深且無驚

於若海

疑作海若

潛盈巨壑亦何怒於陽侯彼弘納之無際

信爲長於百流爾其揭厲莫從深淺無必絕地脉於颺
駛透天池而箭疾善下以潔乎龍堂流謙更清乎鮫室
就其深矣誰識濫觴之源不可方思空想觸舟之實終
始齊赴周流不違似有待而俱進何經始之相依演漾
紆餘必遠分而遁合洄洑激射雖異出而同歸則知海
之爲量也虛而有餘水之趨本也道亦相於二派既朝
於滄海衆星如拱於辰居漢之廣兮明委積之有所江

之永矣表靈長之在諸是俾涵虛之狀益深浮天之容
斯在苟歸塘之不息諒納汙而惟倍大矣哉誰究其廣
深空有望於靈海

衆水歸海賦

以納衆流而
成深廣爲韻

大矣哉海浩漾尋之無際望之無象利萬物以成德總
羣川而爲長柔能善下稟巨壑以包涵握而朝宗觀衆
流之歸往是以臨不測者未足言其濟深思利涉者孰
可詠其河廣究其所由得之在柔濫觴之初因一勺而

畎澮循環無際想三歲之周流伊昔洪水方割夏禹是
理既濬崑崙之輸爰標南國之紀故導之逾遠非壅之
可止將虛受之爲德諒成大而有以且明乎避高之義
自得乎潤下之旨始將就濕想浩浩而其來終類沃焦
見滔滔之未已原夫水反於壑海不厭深其有也靡患
乎汎濫其細也不逆於浸淫是知衆流同歸異源將合
注而不竭但見乎川流滿而不盈更因乎海納廣哉巨
瀛莫之與京萬里波委四時砥平灌以涇不能混其濁

注以渭不能益其清不涌浪而跳沫獨持盈而守成故
得萬穴爭赴九河自同類夫雲之從龍鳥之附鳳又似
一人立國萬方入貢願以含垢之體爲納汙之諷因知

夫海爲川谷之王以寬而得衆

不見而
字官韻

襄華貫洪河賦

以崇嶺橫斷靈
瀆長注爲韻

太極經始純坤傾東勢以嶽鎮氣以川融於是靈闢襄

華象開鴻濛橫大野以中豁夾洪河而北崇而

一作
其

沓嶂無際連波方水噴激萬里迴合千嶺總峭函之氣

象壓秦晉之封境山以河潤上騰雲雨之祥水與時清
下倒巖巒之影若乃騁遠望馮層城秋爽元氣朝昇大
明偉連天之浩汗壯發地之崢嶸翠岫屏擁澄瀾砥平
疑白虹飲壑而半隱似寒雲抱塞而初橫及夫俯臨迫
察詭麗雄恒疑作悍峻勢危而不騫靈源注而常滿一作半
積陰騰氣與嵐色而相鮮燦日生霞連榮光而不斷觀
其畜含精秀孕育風霆應會昌運發揚炳靈茂賢傑於
間出翊邦家而永寧况乎山積鴻休川流景福明徵祥

瑞幽贊化育此其所以配乾坤此其所以稱嶽瀆豈徒
翫夫縈帶委注蓮開翼張巍巍峩峩滔滔湯湯于天之
峻極赴海之靈長而已士有圭竇強學金門獻賦因陶
侃之無津耻孫弘之不遇覽襟帶而增氣追聖賢而遐
慕想劉公之歎微禹其魚感吳子之言在德爲固義由
景行仰高山而自慙志切朝宗與大海而同注儻餘潤
之波及期變化於雲路

三門賦并序

趙冬曦

砥柱山之六峯者皆生河之中流蓋夏后之所開鑿其
最北有兩柱相對距崖而立即所謂三門也次于其南
有孤峯揭起峰頂平闊夏禹之廟在焉西有孤石數丈
圓如削成復次其南有三峯東曰金門中曰三堆西曰
天柱湍水從黃老祠前東流湍激蹙於蝦石折流而南
漱於三門包於廟山乃分爲四流淙於三峰之下觶於
曲隈會流東注加以兩崖夾水壁立千仞盤紆激射天
下罕比時以內兄牛氏壯而遊焉相顧賦之以紀竒跡

大河瀰漫上應天漢濬靈波於積石之西瀑懸流於崑
崙之半茫茫禹功茲焉會同鑿連巖而瀉湫羅岨島以
攢空濶兮若橫兩闕於江上岌兮若稜三山於海中崇
山嶽崧呀水淙射左右飛濤起伏相擊截奔湍兮躋石
臺目霍濩兮心徘徊三峰砥其却立架崇門以洞開連
嶂紆河以壁峭疊巘喬空而半顏洪流感折以全涌激
湍崧窟而相礪苞巒秘隙砭其鼓作徊掣澎瀑灘以山
推奔濤迅復紛其蕩駭蓬渤滑渥霍以雲迴盤渦窅窅

以谷施奔石砰磕以成雷拗怒未洩橫流逆折合如地

轉散若天裂搖騰碧嶼

疑當作刷吳都賦云刷盪潑瀾

蕩珊

疑當作坳他藍

切水衝岸壞也

穴砗岩膏而沫沸淙隘口而湍湫然後深雲霽

靄收濤卷瀨汨汨以無聲漫浩浩以東會總四流而

混合注三穴而滂沛泛洪連於大磧之東薄餘怒於天

地

疑作池

之外當其時也山獸驚躍水禽亂飛魚獺沉潭

以不動獫狝拱樹以相依窟鮫人於洞壑帖舟子於連

漪莫不愁白鷺之初下歎黃牛之暝歸若乃降望金門

瓊猗石觜窮岩萬仞一曲千里松歷歷而生涯草髮髮
而覆水雲蓬茸兮歷地生風颼颼兮百籟驚猿惜暮而
悲叫鳥辭春而不鳴跼嶮岵兮杪崢嶸飛客心兮動客
情憐石菌之冬茂賞瑤芝之夜明惟夏君兮永蟄拜靈
廟兮何及棟梁古今山鳥棲階壁蕪兮野鼯入感微禹
之歎深亢幽譌以佇立歌曰申負石兮空自竒客乘查
兮何遠爲君不見虛舟之泛泛浩乘流而不羈

涓水象天河賦

以題
爲韻

劉 珣

昔我先王肇脩人紀乃建邦國以立都鄙或處沃而稱
輿或宅中而爲美周分景臺之測用會陰陽之擬漢據
鶉首之分實爲山河之理故右扶風而左馮翊距涇川
而浮渭水潼函襟帶豐鄠魏峩下則崇岡於地險上乃
取範於天河城雉周環而斗設宮觀駢牙而星羅轉曲
江於前岸俯冀關於中波車馬誼流渾派聲之交錯風
塵日夕與津霧而相和蓋聖人垂則必天之象王者都
會大洽斯享運璇衡以齊玉燭法露盤以崇金掌四方

輻湊萬國攸仰風雲以之吸合日月於焉澄朗苟禎祥而應會則乾元之攸往何必河出圖洛出書然後為卜食之華壤者也懿哉作者元后中興後嗣同天之道順人之意橫橋乃牽牛之設素滙則飲龍之謂晚光澹艷接鳳苑之祥煙曉色清明連斗城之佳氣樓臺傍而津涯隱伏鐘鼓作而波濤汨沸不覩斯焉以取斯寧復知王者之貴不察所由於所以又安明坎德之靈而主乎渭徒觀其遠界汧隴橫截秦川沃長安之霞日浮京兆

之雲天都邑傍於左右舟楫來而沂浴上林之煙開霧
卷建章之戶萬門千朝而望兮蓬瀛若留乎岸側久而
臨也河漢宛在乎目前是以婁敬云被山帶河四塞爲
固豈不謂天道無親惟德是輔祥符不及瑞圖斯遇以
登仁壽之理用表坤靈之喻請謂東周安處先生之徒
與須知西朝翰林主人之作賦

清濟貫濁河賦

以與濁同流清
源自別爲韻

李君房

濟有瀾兮清泠不窮以清激濁兮洪河之中迤靈長而

委注忽洊至而爭雄懼溷乎泥我則貫而愈淨將合於
道我則和而不同徒覩其虛明皎潔秀色澄澈漾清泚
以遐分界飛濤而劃絕始騁迅以中瀉載流謙而東洩
德惟靜自澄之於本源體雖柔豈混之於派別懿夫貞
不受汙清非可混噴中流而激射劈巨浪之崩奔狀浮
雲決開晴天之灑空碧若輕埃乍斂明鏡之洗蒙昏遠
而望之孤煙橫於曲渚迫而察也霜練引於靈源是知
夫道惡比周物莫相與彼流濕之爲類尚沿源而異處

匪泥沙之可雜豈湍狀之能阻越洪濤之浮浮駛清浪
之悠悠不學溜澗之難辨且殊涇渭之同流予以用之
甘見和之醴就其深矣欣可泛乎舟狀盤渦之淺澗不
染乎濁湔跳沫之飛驚不傷夫清均上善以清美含至
虛而體平度龍堂而愈灑洗貝闕而增明何必溱洧之
陽然後濯其髮寧俟滄浪之畔然後澡其纓截河而流
所以為異導沈而注明乎所自醜濁波而迴逗沛驚湍
以自致庶彌久而不渝鑿妍媸兮無媿

第二

同前韻

許堯佐

河之並濟兮惟秩其平濟之貫河兮勢若相傾非剛克
無以見其柔立非甚濁無以彰其至清是以靈源濬發
柔德兼呈徒觀其流波委注秀色澄澈冲融而濁水遙
開鼓怒而洪流直截遂使還淳之士疑二氣之初分策
功之臣驚一帶兮中裂既處濁而不染每含貞而自潔
苟與和光者殊致寧與湜泥者無別是以霍濩波激崩
騰勢翻濟水與河水相輝光容易識清流與濁流不雜

質性難論苟徵之於變化可察之於本源于以表德于
以辨類方九折而橫流啓重泉而直至故以盤渦渾曉
日之輝疊鏡寫晴峯之翠絕河而去孰與我爭先導汎
斯來孰謂我奚自若乃冲虛是翫迅激難儔廣可涉兮
思航葦於寒渚清可挹也欲濯纓於夕流貫長川之浸
浸委輕浪之悠悠然下流綿邈願表清而不濁上善昭
融故守和而不同故可扶正直之純志助潤澤之成功
動連漪於迴浦萃光景於微風且淮之清兮濱於夷江

之遠兮界於楚豈若貫大川以揚波臨大都而分渚含
清濁而獨秀求匹敵而誰與苟河清之可期願朝宗而
爲侶

渭水貫都賦

以帝王建都取
諸上象爲韻

衛次公

清渭天鑿名都王制貫金城千里之域寫銀河九霄之
勢同穴發源衆川潛泄分黑水以渺漫遶黃山而迢遞
水能濟物用導於中州君德配天故法於上帝都之會
也皇皇渭之流也湯湯異東西之漚澗非汲引之沮漳

夏后濬川分流非肇於伯禹秦德王水貫都必因於始
皇照雙鳳之丹闕架長虹之飛梁褰裳者不勞於揭厲
濯纓者何必於滄浪泛彼樓船掩橫汾於武帝濱之釣
叟感入兆於文王且夫前王酌憲惟皇都之所建度地
有孚因貫渭之上腴曲抱乎周原秦野旁臨乎八達九
衢既流衍以紅粟誠輝煥乎黃圖則知八水皆流豈清
於渭水五都並制莫大於西都原夫渭者雍之巨浸都
者人之所聚天垂法君必取曳雲間之清渭何殊雲漢

移天上之紫宮洞開天府及乎縈流一帶中派紆餘蕩
元氣澄太虛稽前典而備矣於名川而舍諸豈惟積潤
於庶物固亦近壯於皇居至乃春景澄廓晴霞朗暢涵
萬象於影中度牽牛於波上客有觀光者於茲而寫望
美夫取法可仰因天垂象疏紫陌而逶迤流丹霞而蕩
漾周公卜洛雖云風雨所交秦后貫都實謂膏腴之壤
惟洪業之永固與渭流而彌廣

涇渭合流賦

以題為韻

獨孤綬

遊者感異源而合趣指涇渭於秦樹涇如經也自北而南流渭若緯焉從西而東注性相近以不息勢使然而自遇湜湜其止昔既聞之於詩湯湯其流今則狀之爲賦夫至清者渭至濁者涇惟清也鑒物之道著惟濁也含垢之義形共導金氣咸通井星混殊流之昭晰成一帶之濛濛初以縱亂橫似爭長而難雜終以潔受污何極睽而乃合禹功之所兩存漢苑斯馬博納乍異其色覺游鱗之隱見必同乎聲帶長風之蕭颭象昭回之可

求歌鄭白之有由飲馬投錢足以發明廉士決渠降雨
足以殷富神州既相弘以利物寧自異乎並流知之者
齊我以不皦不昧感之者比我於一薰一蕕斯乃柔以
長存和之足貴近則順洪河之紆直遠則成滄海之濩
渭同功一體叶靈通氣信殊穀洛之流寧爽溜澗之味
夫然彼獨清而無偶非達識之所謂

文苑英華卷三十四

欽定四庫全書

文苑英華卷三十五

宋 李昉等 編

水四

新潭賦二首

秋潭賦一首

小池賦二首

清泠池賦一首

漲昆明池賦二首

墨池賦一首

盆池賦一首

新潭賦

王泠然

國之天府名曰河南水有清洛漲乎新潭夫其貫都成
川習坎為德石門呀豁而洞瀉綠樹逶迤而夾植源自
山來漕因人力或清淺而見底或深沉而莫測奔狹口
以雷聲積中心而黛色若乃方將暮春大集都人錦筵
橫石羅幕藉塵騎影攢臨變作桃花之浪衣香亂入翻
為蓮葉之津由其地勢多美所以潭名永新觀其城闕
映帶閭閻縈繞半向石崇之園斜經潘岳之沼星月沉
浮乎其內烟雲洗拂乎其表不生芰荷但聚魚鳥通舳

艫之利於國既多開浸灌之功與人非少自記從調恆
來此遊朝林坐而疑夕夏潭行而覺秋清可照人實欣
逢於朗鏡虛宜受物佇相引於仙舟帶洛常恥臨淄更
羞况獲忝乎餘派終敢希乎下流

第二

張環

惟國之左當河之南分逶迤之舊洛漲浩漾之新潭觀
其沙石中映魚龍內涵泛危槎而獨隱紛衆水以相參
原夫引派潛迴䟽源洞出淙石門以雷注透金塘而箭

疾暝浮天漢之雲晝洗岵夷之日雖習坎之爲常乃流
謙而不溢若夫正月登晦韶風報春花明上巳柳暗長
津出金埒之遊騎下瓊樓之美人愛清流之疊疊走香
駕以鱗鱗樂此幽勝禊乎陽濱竭主第之羅幕盡侯家
之錦茵窺浴鳥之呼伴見飛魚之觸綸既靈長於上國
恆見美於斯辰若夫黛色冲融清光晶了綠苔一點疑
濯髮於江波青楊四周若連帷於漢沼湛珠彩於星夜
流鏡華於月曉苟形影之可觀乃妍媸而必表歲蒼茫

兮寒氣冽潭皎潔兮生堅冰比玉卮而逾淨對瓊華而
更凝猶不若鏡室之爲朗銓臺之可稱庶狂愚之可鑒
知簡要而相承

秋潭賦

以秋氣清爽資
彼澄澈爲韻

王起

洒彼積水凜乎高秋秋應律兮則勁水爲潭兮至幽當
草木之不芳獨開翠色因天地之始肅更變寒流匪騷
人之詠歎實知者之娛遊爾其畜齋淪之色得蕭瑟之
氣就其淺則疊疊共清臨其深則兢兢足畏居下流之

可保信上善之爲貴寂爾不動湛然恒平正衣冠而逾
審燭毫髮而必呈性則納汙能積小以成大時方收潦
故沿濁而更清鷗浪不振鷺濤不驚同至人之虛受比
君子之持盈懿其歇昏靈羅物象峯巒之所攢列雲烟
之所來往媚潜虬之幽姿疏遊人之煩想不汪汪於千
頃自泠泠於百丈寫星火兮初流涵珪月兮始上湛清
華於古木予以交輝澄鮮彩於層空於焉競爽虛明莫
映皎鏡無私處不爭而成德體自然以爲資金風乍搖

似易水蕭蕭之日木葉方落如洞庭嫋嫋之時映泐寥
之遠天動悠揚之短晷與碧落而相合將清光兮乍起
淨如練兮可名清濯纓兮增美儻朝于海知引往而納來
如挈其瓶可注茲而挹彼安波皎潔利物含弘溢金隄之
晶晶窺銀礫而澄澄飛螢乍臨疑列宿之在漢纖鱗或躍若
迎春而上冰豈清淮之可翫何靈溪之是矜則知沸潭無
湧聞之於栗烈寒潭見底稱之於洞澈孰若積玄流當素
節金鏡同朗冰壺共潔既妍媸而照臨幸清通之區別

小池賦 并序

唐太宗

許敬宗家有小池作賦賜之

若夫素秋開律碧沼凝光引涇渭之餘潤縈咫尺之方塘竹分叢而合響草異色而同芳徘徊躑躅淹留自足疊風紋一作丈兮連復連折迴流兮曲復曲映垂蘭而轉翠翻輕苔而動綠牽狹鏡兮數尋泛芥舟而已沉湧菱花於岸腹劈蓮影於波心減微涓而頓淺足一滴而還深于時景落池濱霧黯踈筠卷舒澄霞彩高低碎月輪

露宿鳥之全翮隱遊魚之半鱗岸隨年而或故流與日而終新雖有慙於溟渤亦足瑩乎心神

小池賦應詔

許敬宗

臣忝班下列昏宇上京欣託巢之有庇體墜戶之全生爰鑿小池依於勝地引八川之餘滴通三涇之洋溢慕鑿止而端形乃遊智而清志爾其潺湲繞砌漱沒縈除擬高陽而不足比蹄涔而有餘游瑩劔之微鳥躍露鼎之纖魚乃若倚井傍通桃蹊俯映仰天津兮共澹潔秋

景兮俱淨倒列宿以疑珠含望舒而似鏡觀江使之潛
處翫波臣之沉詠於是飜光甕牖漾影蓬門溜激石兮
長嘯鳧鼓浪兮相喧竹凝露而全弱荷因風而半翻足
以澡瑩心神澄清耳目對昆明而取况喻春蘭與秋菊
不羨寶於河宗豈希大於暘谷彼瑤池之高醮固幽遠
而空傳此坳堂之信遠遂騰譽而聞天降臨渭之睿藻
連橫汾之曩篇何微生之一日荷大賚於千年

清泠池賦

王泠然

梁王既受封於漢命駕東游入睢陽之下國吊微子之
高丘榮華莫比僭擬無休復欲象昆明之校戰同右武
之習流決河間而飲馬治宮樹以維舟當時舊跡此地
爰脩土木間成起臺宮而似畫絲金並奏和冰石而疑
秋是時宮人出看上客淹留既成此池勝形無比喬樹
青冥而外合層甍茂葉而斜指曉坐狎鷗春祠薦鮪連
小山而夾迴磴截長河而分半水徒觀其清冷無點洞
澈如凝鏡開珠淨月澗星澄鳧嚼紅藻龜翻碧菱地將

昏而霧合天欲雨而雲蒸明則可鑒虛而不竭風靜浪
碎日落圓折波含閣而相動潭映空而俱澈此土之池
君王所爲年深則峴山陵變水浹則滄海塵吹不見射
魚之浦空餘養鴈之陂皇家化溢成周包含一作梁宋

分星辰以主萬國會江漢而歸一統惟茲之池清而且
平居下流而不濁含上善而逾明常以柔而處順豈遺
道而從榮時人競渡搖海艦於三春暮客來投落江帆
於四岸何今日之登陟皆昔年之池館物是人非所存

者半濟巨川必待舟楫得風流還升汗漫儻餘波而可
需幸不遺於所觀

漲昆明池賦

以池滿春流思
象河漢為韻

張仲素

空濶靈沼蒼茫舊規昔穿焉迎秋而大閱戎艦今漲也
乘春而無竭陂池時則陽候既序陰冰已泮天子乃詔
京尹以充役命水工而叶贊陳衆力而雲鋪勃興決萬
派而箭流共灌澹汪汪之積水似耿耿之斜漢况復穀
雨初霽天桃正春揔上善以利物涵聖澤之深仁軼彼

宮沼瀾如海濱鼓金堤之曲岸揚石鯨之彩鱗浪湧煙
郊更失辨牛之淡日華翠激纒分織女之津伊昔殊荒
未化勤遠是思非障澤之渚矣將水戰而隸疑作之構

館浮鷁以遨以嬉猶獺呈形有類於文身之俗鳧鷖亂
響如習乎下瀨之師春水平兮波暖春日煦兮沙暖雖
守柔以易狎竟安卑而就滿重泉之沫騷騷而若迴淺
沚之毛離離而漸短至若鏡朗風收澄明不流沃餘潤
於荒野引孤光於釣舟豈獨鼈蜃是獻實亦龜龍載游

厥跡既往前聞可想故人遙集曾分劫火之灰蕃帥來
朝暗識滇河之象其漲則那式詠且歌開鄭白之墳衍
流畎澮以天波瑞氣長凝表宸居之在鎬晴虹乍飲若
榮光之出河大哉水之爲量皆從夫一勺之多

第二

宋 悛

於廓靈沼其流湯湯控清源於近甸澄積溜於方塘頃
者天子時欲出池苑瞻農桑納獻可之規諫設成務之
紀綱乃斬杞柳破隄防將欲抑耳目之遊觀資稼穡於

人康一物失所若已納隍竭其澤則龜魚無咸若之地
害於物則邦家無好生之方豈以成功者不可以適變
識道者克在乎順常乃天意怡豫人謀允臧不遠而復
載濬其隍前已押亦既具畚鍤亦既豬沼泚將挹彼而
注茲乃引流而激水揔括趣絕見鯨波之大來委輸成
深覺鳧舟之漸起且池之盈矣亦云自瀕脩軌躅雖聞
於仍舊開汲引終期乎取新鱗介將枯而復躍草木咸
滋而更春皇矣我后有其仁懿乎哉仰對一水旁連

九陌流惡有類於汾澮納汗頗同於川澤煙收霧歛混
天色而波清秋霽霜晴浮月華而影白載育菱茨一作茨
羣浮羽翮將飛有翼時棲太一之雲欲濟無梁幾滯壁
池之客且流謙者聞於善下惡盈者誠於忌滿儻從事
於水鑿庶可形乎長短

墨池賦

以臨池學書水
變成墨為韻

王起

墨之為用也以觀其妙池之為翫也不傷其清苟變池
而為墨知功積而藝成伊昔伯英務茲小學棲遲每親

乎上善勤苦方資乎先覺俾夜作晝日居月諸挹彼一
水精其六書或流離於崩雲之際乍滴瀝於垂霧之餘
由是變黛色涵碧虛浴玉羽之翩翩忽殊白鳥濯錦鱗
之漈漈稍見玄魚則知自強不息允臻其極何健筆之
成文變方塘而設色映揚鬢之鯉自謂奪朱沾曳尾之
龜還同食墨沮如斯久杳冥不測愛涅者必染其緇知
白者咸守其黑蘋風已歇桂月初臨玄渚彌淨玄流更
深所以恢弘學海輝映儒林將援毫而閱目豈泛舟而

賞心其外可察其中可見同君子之用晦比至人之不
炫冰開而淳漆重重石映而玄圭片片儻北流而浸稻
自成黑黍之形如東門之漚麻更學素絲之變究其義
也如蟲篆之所為悅其風也想鳥跡之多奇將與能而
可傳可繼豈謀樂而泳之游之耻魏國之沉沉徒開墨
井笑崑山之浩浩空設瑤池專其業者全其名久其道
者盡其美譬彼儒疑作濡翰成茲色水則知遊藝之人盡
以墨池而為比

盆池賦

以積水盈器如
望深池爲韻

浩虛舟

達士無羈居閒狎竒陷彼陶器疏爲曲池小有可觀本
自挈瓶之注滿而不溢寧逾鑿池之規原夫深淺隨心
方圓任器分玉甃之餘潤寫蓮塘之遠思空庭欲曙通
宵之瑞露盈盤幽逕無風一片之春冰在地觀夫影照
高壁光涵遠虛潛窺而舊井無別就飲而汙罇不如雲
鳥低臨誤鏡鸞之縹緲庭槐俯映迷月桂之扶疎是則
涯淡非遙漪瀾酷似沾濡纔及於寸土盈縮不過乎瓢

水蘭燈委照以珠動紈扇搖風而浪起沉蛛絲為羨魚
之網深抵百尋浮芥葉為解纜之舟遠同千里想乎泥
滓無染泉源本清盛之而細流不泄鼓之而圓折長生
蛙穿而別派潛通想漏卮之難滿雨落而古痕全沒知
小器之易盈及夫岸灑灑以初平水汪汪而罷漲韜雲
分白璧之色映竹寫圓荷之狀光翻曉日誰謂覆而不
臨底露青天孰假戴之而望至若煙靄沉沉莓苔四侵
方行潦而不濁比坳堂而則深遂使好勇之徒暗起憑

河之想無厭之士潛懷測海之心故得汲引無勞泓澄
斯積環織草以彌澈泛流萍而更碧沙洲連一畝之地
山翠接如拳之石悠哉智者之為心聊覩之而自適

文苑英華卷三十五

欽定四庫全書

文苑英華卷三十六

宋 李昉等 編

水五

雙漢泉賦一首

蒙泉賦一首

娥女泉賦一首

舒姑泉賦一首

廬山雲液泉賦一首

望瀑泉賦一首

飲貪泉賦一首

性猶湍水賦一首

割鴻溝賦一首

雙漢泉賦

以泉澄水澈皎
鏡春冬為韻

王潭

呀厚地而濫涌者有河東之漢泉拆陰開竇沃日浮天
初汨沒圓衝拂高湍於柔祗之下復逶迤遠注散餘波
於馮夷之川為神龍窟宅之上而致美為陰陽蓄泄之
所而通玄將海日泓浚而昭此豈坤儀挺拔以隳焉來
何所以去何所止始開雙漢發輝於汾魏之郊竟助洪
流歸潮於渤澥之水借如夜色初升空光下凝繁星映
而珠滿新月入而鈎澄洎乎風駭霧勃煙涌雲蒸則有

鬼神倏閃以恍惚蛟螭鼓怒以噴騰異物之與詭恠孰
可得而備徵意以爲潛虛洞決脉流派別雖一河有隔
終陰隲以相連故數眼分開涵碧虛而共潔

未見漱
字官韻

是

以百尺澄兮四空晶珠胎明兮沙岸皎洗拂煙埃蕩漾
魚鳥亦能涼生朱夏氣暖玄冬守謙下以含道順畎澮
以利農道則以物爲賓水則假利於春人有情於利水
水無意以求人人之自僞我豈非真故至人以水爲德
以心爲鏡鏡雖明不利於人故漢之爲澤也廣泉之爲

鑒也淨若壅而閉則澤不能及物混而濁則鑒不能自
正故選士者象清漢以含虛懷才者但明心而未映苟
能酌憲於茲泉則可以相鹽梅而翼聖

汨沒一作汨滑
珠胎明兮一作

燦珠
胎兮

蒙泉賦

李程

蒙彼東山山下有泉運未逢於畎澮色空積於澄鮮虛
明可鑒澹泞自然宜習坎以爲德胡止艮而莫前士有
酌而歎曰惟水之義萬物之利顧導達之或闕將灌注

而奚遂朝宗路阻未歸朝夕之池潤下功微空浸尋常
之地且夫壅則止理則通能致遠邇任決西東荷四氣
之平均潛生麗藻處重陰而蒙蔽尚隔清風亦有舒女
化而稱異耿恭感而成功彼皆因人而有託此獨居然
而在蒙懿其滿而不盈卑以自處岷山未測且覩濫觴
之時滄浪是期終異濯纓之所性則全柔德無與儔能
載清而載濁諒可泳而可游將注江湖終有希於上善
未分涇渭誠無惡於下流嗟止水之奚匹念發源兮在

斯當其一勺而可挹豈待成川而後知儻理水之有便
諒餘波而可期他日敢以勝載之力冀裨舟楫之時

娥女泉賦

并序

李蒙

泉在寧陽城南二里古老傳稱娥女美容色善歌舞度
曲此地化為泉生於巖石間垂灑如淚故云耳

水之裔巖之偏變彼娥女瀏為沆泉伊昔巧笑淑靈濃
華艷色頰唇發而寥亮素袖盤而掩抑故能傾北方掩
南國超俗絕世神窮化極於是淒兮雨濕黯兮雲沉銷

玉貌與紈質冶瓊姿及蕙心舞成水態歌入流音臉眇
眇以波盡眉娟娟而月深觀其岸草翠積崖苔綺映列
山光以汎艷懸樹色而涵靜引耀冰玉貞明石鏡能含
上善之心不改至柔之性若乃蠲祀典戒良辰蘋藻前
奠笙竽下陳莫不淋漓玉集滴瀝珠新聲嗚咽而成韻
淚闌干而向人及夫巖風歲晚熾景炎節水壯河沉流
枯海絕則必濕溜冬汎寒光夏冽異黃泉之下冥殊遊
水之東閱噫化將云盡奚假物而獨靈道或既存雖得

仁而何懟靡度可持

此句疑

安知榮悴望神光兮水潛鑿

化跡兮山悶塞杜若以誰與弄潺湲而增思

舒姑泉賦

以記云舒氏女化為泉為韻

浩虛舟

漂水之上蓋山之前昔有處女化為澄泉瞻風而艷色
如在責實而寒流宛然原夫曠別幽室暗悲韶年顧容
華之莫守望世人而都捐儼弱質以徐來顏猶灼灼委
貞姿而色動聲已涓涓眷戀無心淒涼故地念嬋娟之
可惜驚變化而殊異俯視清流託誠幽意陳翫習而斯

在庶精魂之能記素鱗賴尾渾非舊日之容急管繁絃
徒盡平生之志既而水府潛處幽冥既分凝情而淑斂
寒色冶態而波生細紋泛浮影於中流遙疑嫋嫋逗鳴
湍於別派遠若云云由是鱗甲與遊綺羅長阻迷綠沼
之迴復忘紅樓之處所源通湘渚寫幽恨於靈妃流達
漢舉導春心於遊女淨色含虛清輝皎如烟凝泪以香
起苔爛斑而錦舒浦水光搖似動橫波之末岸莎風靡
如存髻髮之餘想夫紈質已銷陰靈未謝濯衣彩於花

晝洗鏡光於月夜泠泠不濁殊畫地而俄成瀟瀟無窮
類拜井而潛化且靜而清者水之宜柔而順者女之爲
憶朱顏之婉婉柔碧溜之逶迤浮沫粉聚懸流淚垂泛
萍藻而翠翹零落動菰蒲而綠帶參差及夫亂草丰茸
古墟荒毀雜泥沙之汨沒蔽音容之妖靡至今閭里之
人空傳其名氏

廬山雲液泉賦

并序

吳筠

筠所居之東嶺其側有泉洪纖如指冬夏若一山少凡

石至多雲母其水色白味甘且滑此則雲母滋液所致
因名雲液之泉乃結宇其旁引於軒廡之下既飲既漱
求翫無數今茲夏季不雨至於十月江湖耗井澗涸此
泉泠泠不減乎昔懿其若是爰以作賦

坤元孕氣潛暢成泉冠五行之首為萬物之先爰有清
泚出此山側處蒙險以難知猶井渫之不食我搜靈秘
載披載登見其地僻至潔源深有恒凝寒不為之損暑
雨不為之增乃考室以飲而樂在枕肱其侔玄玉之膏

滴乃雲華之液疲可蠲生可益引支狎翫惟意所適懸
之則素皎壅之則澄碧晝浮光以悠揚夜含響以浙瀝
陰陽為災水旱失節不雨炎夏暨乎玄月汪汪洪波久
已竭耿耿瀑布今已絕挫江湖之浩蕩沉澗谷之微劣
斯泉秉彛毫纖無虧雖遠不霑惠而近有所滋彼澎湃
於疇昔豈不慙涓涓於此時夫醴泉無源而易涸丹溜
乍見而難挹曷若止以為鑒酌焉取給何異神仙之漢
帝臺之漿涌異域之表湛無人之鄉茲亦標竒於絕境

真可謂靈而長者也

望瀑泉賦

李華

曙無雲兮川無波泛余舟於空碧彼廬山浮重湖之上
兮我極天之峻壁凝黛色之深明噫林嶺之岑寂何神
造之杳冥躍騰泉於山脊孤流皎皎于蒼梁翠淙千仞
兮懸帛玉繩縋於寥天銀河垂於廣澤春風雷兮徒霜
雪穿重雲而下射白龍倒飲於平湖若天地之初闢委
滔滔兮東逝詎知夫維今之在昔何倚高帆而一望豁

余心兮灑滌近古有鴈門上德兮昭洗塵昏柴桑間士
兮捨印推尊靈境殊象詮微究源人已古兮山在泉無
心兮道存將默貫於精極欲置之而不言

飲貪泉賦

以言飲此泉心
終不易為韻

胡權

吳隱之擁節南海停驂石門遇貪泉之廣陌若旨酒於
汗罇由是徵圖籍所載考者舊之言云注茲而難窮地
理或飲者而能移性原公乃斯言已察其事惟審十目
所視表執心而不回一勺之多遂舉盃而就飲重言曰

所執在我寧由此泉瀉泠泠而反同潔已持惴惴而過
甚防川恬淡相資漸滂沱於德澤清廉是守何汨沒於
情田將正浮俗而去彼覩濫觴而在此臨川而不覺起
予命酌而甘從率爾盈科即挹聊抒思以盤桓健筆忽
飛寫緣情之綺靡既而威臨俗鎮塵靜邊空闔境而皆
知嚮化四方而靡不趣風量比滄溟能控清而引濁心
如白水可原始而要終當其境接遐荒郡惟幽僻山川
而多含瘴霧草木而少蒙膏澤道之云遠人不願適公

藏器以俟時方遇君之側席泉云飲而名乃益彰心秉
直而誓當不易則知貞清特立瑕穢莫侵人飲酒而蕩
志我飲泉而洗心胡不誇於一石而不愧於千金予以
明好惡定能否不貪為寶而可憐疑不飲盜泉而非偶
懿哉君子之鴻名竹帛永垂於不朽

性猶湍水賦

以性之為善猶
水趨下為韻

吳 冽

人立性兮誠明為本水激湍兮動直惟柔將以遊心於
澹故其從善如流天理斯在坎德可求謂寘懷而必將

流惡同赴勢而咸得處休至人之情唯當浩浩君子之道所以猶猶原夫性本皆善誘成遷化端有常行決而上下得其道則致和平汨其流遂成姦詐故聖人行當順動義不詭隨欲滔滔而處下逾潔將淼淼而致遠不疲順意周流誠隨波而遷染由衷激發庶合道以云爲託以洗心從之潔己尊派別脉分之要道守滌瑕蕩穢之至理符老君之立教心乃善泉同太史之奏言德方在水勢雖相近意當一揆法潤下流謙之迹莫非有爲

為之愛漂沙宕石之功是皆景行行止心源洞適德澤
潛敷在審思其決泄豈求潤於霑濡遠近相沿宛見為
仁由己始終共濟足見循道而趨不然則喪其貞失其
正動必旁午志皆紛競安能使通達為無滯之姿稟受
成善利之性德如毛而轉潤行有葉而逾滋心鏡之前
若光明而上下察也情田之內同澹汨而左右流之懿
其義戒中人事標前典是明各有原本不可遷移豈徒
虛閱波瀾以方清淺若然者信乎孟子之言所謂懲惡

而勸善

割鴻溝賦


以割土開城去
存深跡爲韻

侯圭

龍爭虎鬪兮萬象交奔
鏃盡兵窮兮白日猶昏
潛豹略而久困
割鴻溝而兩存
臨屹屹之重關
平分海嶽
指遙遙之一水
畫斷乾坤
秦之末世也
鹿走中原
人殃下土
天垂不定之氣
代作分爭之主
皆欲呵叱羣類
鞭笞萬宇
或功侔擘嶽
掃氛祲以將清
或力並觸山
缺穹昊一作
昊而未補
爭馳羽檄
欲定雲雷
共假長山之隔
濶請如

橫漢以昭回劈六合以中裂割八紘而半開於是對戰
雄稜俱停執馭盟高岸以斜指約中流而內據霜戈雪
刃擁雲陣以東歸火熾虹旗扶日輪而西去險隘瓜剖
深沉帶橫兩曜而寧休暈蝕重宵而未落撓槍晉魏周
韓出地表而共宗函谷燕齊楚越徹天涯而盡屬彭城
池塹彌堅人煙漸隔瘡痍詎息於餘略兵甲俄循於舊
跡孤軍外鎖截南北於千城萬馬重來併華夷於一擲
由是霾陰再合霆霹交侵疆者功淺弱者機深空欲限

溝洫之迢遼閉關河之阻尋分地理而不分天理割波
心而不割人心及夫垓下之劍不還江上之師莫遏始
知鳳閣之難處徒想鴻溝之獨割至今京索之原古津
空濶



文苑英華卷三十六

欽定四庫全書

集部

文苑英華卷

三十七至
四十二

詳校官內閣學士臣瑞保

助教臣常循覆勘

總校官進士臣朱

鈐

校對官中書臣葉

蘭

謄錄監生臣馮

蓋

欽定四庫全書

文苑英華卷三十七

宋 李昉等 編

水六

浮漚賦三首

潢汙賦一首

尺波賦一首

溺賦一首

浮漚賦

崔 根 總目
作損

仰參造化之理俯察宇宙之功既希微而不測亦要妙
而無窮至如殷雷發谷激電流空石鷺飛而迎雨銅鳥

振而驚風已而懸溜不止空庭積水對霧霏而歷覽見
浮漚之邈迤瑩映澄澈內明外美倏往忽來乍滅乍起
含卷舒之度得行藏之軌其柔也則隨波以為心其剛
也乃觸物而忘己諒潛運之恍惚孰能察其終始浮漚
之義大矣哉俯而觀之錯落煌煌若明珠之出合浦遠
而望之矚矚和一作旁羅若衆星之列長河爾其因水發
色以空成相懷清潤之秀氣負圓通之雅量信天澤以
成姿豈人圖而為狀且夫勢有萬端形無定質或繁小

而爭湧或希大而間出從下流而守謙託上善而非溢
冀輝彩於當年故韜光于晴日

第二

楊炯

在霖霖之可翫唯浮漚而已矣况曲澗兮增波復坳堂
兮漲水雷滴瀝兮行注階潺湲而浪起寸步百川咫尺
千里於是乍明乍滅時行時止排雨足而分規擘波
心而對峙輕盈徘徊容與庭隈狀若初蓮出浦映晴波
而未開又似繁星落曙耿斜漢而將迴合散消息安有

常則倏來忽往不可爲象雨密稠生風牽亂上若乃空
濛采褰浩汗浮天流平舊沼派溢新泉分容對出吐映
均鮮觸流萍而欲散礙浮芥而還連光陵虛而半動影
倒水而分圓始參差而別趣終宛轉以同沿歷亂踟躕
漂沸縈紆細而察之若美人臨鏡開寶鑿大而望也若
馮夷剖蚌列明珠逐風波而澹泊乃變化而須臾迹均
顯晦妙合虛無同至人之體道亦隨時而不拘夫其得
坻則止乘風則逝處上下而無窮任推移而不繫似君

子之從容常卷舒而不滯故其在陽則隱在陰則出世
泄悠悠匪徐匪疾固自然以見體託行潦以凝質類達
人之修身故不欺於暗室蕩薄畎澮鼓舞洲渚其生兮
若浮其居兮若旅雲銷雨霽寂無處所唯斯物之靡依
獨含情而應機暫假有而示潔終淪空而匿暉苟無心
以自累夫何適而有違

第三

鄭太昊

粵若雲橫於斗月離於畢石鷺初化泥牛未失重陰潤

礎看澍雨而交飛行潦浸階見浮漚之亂出爾其合散
無常漂蕩自然形色虛潔表裏澄鮮似珠胎之出漢若
星象之浮川拂還風而獨轉偶到

集作
倒

景而雙圓夫其

仁也不輕蛙黽之穴夫其勇也不怯蛟龍之泉觸奔槎
而遽碎近浮藻而還連觀夫遶砌潢汗迴塘綠水長檐
連屬通溝表裏排亂滴而攢生逼淥流而細起乘川則
逝遇坎則止雖有近於泥沙信無累於蠶滓既生既滅
如幻如夢體象明媚上下冲融徘徊未息展轉何窮識

盈虛之不定知造化之皆空則知生也若浮榮兮如寄
秉陰守不競之德就下保撝謙之義清虛自若有高尚
之風隱顯無恒有行藏之智別有縉紳公子思浮思沉
乘時趨勢佩玉鏘金見浮漚之形象息狙詐之機心况
乎失路書生懷憤胸臆規術恬靜節行孤直覺萬化之
俄頃知千齡之瞬息能不操紙殫毫叙浮漚之德

潢汙賦

并序

錢起

潢汙水之微也汲引之際人皆捨諸唯有德者知之薦

鬼神以昭忠信則百川雖廣莫逮其用焉喻士先沉後

伸放

疑作於

知已也辭云

潢汗之水天實降之雲散雨絕淵然在茲胡稟柔而成
性能處下以任時善乎濁而徐清貯之將綠棄捐池沼
之外隱翳林臯之曲接九派而何勞方一勺之自足至
若雲霽地表霞開水陰乾天可鑒物象是臨山曉映而
色近雲高淨而影深險阻不行芥舟寧覆盈滿知節鴻
毛匪沉產蘋繁同南澗之有藻聚飛動異舊井之無禽

斯其善利也乃至人之用心且夫出山者泉歸海者川
汲引無絕隄防在焉彼苞蕭屢浸束楚不傳唯潢汙也
獨此晏然其明若昧其壅若退竭而自中盈不侵外天
資其潔德維貫神明人棄爾微道不行吠澮夫事有小
而可廣運有塞而必通當休明之聖代徵河酌之古風
彼湛然以虛淨盍薦之於王公俾爾忠信昭明有融俾
爾嘗祀景福延洪斯則椒漿與桂酒可以比美而同功

尺波賦

以水澹幽色風
初起波為韻

錢起

漱艷駭水齏淪始波引分寸之餘風從一勺激尋常之
內無爽盈科勢將全湧迹異盤渦蹙跬步以無數蕩分
陰而自多觀其日色遙臨風生未已圓規可驗疑沉璧
之舊痕前後相伴若浮書而競起跡疊相近萍縈有餘
促漣漪之散漫擁跳沫以虛徐流脉中移類蠖影求伸
之際浮光上透若雪華呈瑞之初湧以回回馳乎澹澹
始羣分而下瀨將積少以習坎生而有準動必若浮如
投石以花散等覆杯而迹幽影不過於布指光遽溢乎

寸眸洶洶安翔似欲將乎斗注油油增繞如潛運以環
周無驚川后未發陽侯當澹以成之寧同瀑怒謂小爲
貴也爰進涓流淺漾風光輕蟠水力寸長所及知文在
其中方折是為見動不過則散或往之浮彩轉初盈之
淨色將潛竄戚之鯉半未能容若流張協之薪重而纒
得汾濕若沖溶滴相通未合流於油岸方鼎沸於汾風
巖石愈蹙淪池不融是將寬其泓量誠有重於泉蒙護
也如委淪然可視茲延袤以上騰匪徒旋於中泚翠湫

交映璇源共紀將不退於大成固在乎有便於風水

溺賦

楊夔

玄微先生澹慮澄情樓倚岳陽湖觀洞庭渺漫兮若與
乎天平遠指君山一螺黛青遙覘湘浦一片雲明輕檝
巨舸載縱載橫或楚歌以應棹或漁唱以齊征雖云吳
楚之濶於焉瞬息之程俄而濃雲興猛吹作訇訇兮雷
霆零零兮雨雹波勢兮奔騰波聲兮濟灑或若積雪或
若裂壑樓岌業兮地如落歌檣側帆倏出欵入煙馳霧

驟神號鬼泣忽翼舉忽蟲蟄波而解浪而傾者亦一瞬而俱及雨既霽風亦止呀呷餘波振蕩未已俄有呈其板而流者碎其蓬而飄者彼緘滕之篋扁鐻之櫃委翳波間罔知所秘或一竹以脫命或舉族而咸墜沿汀遶濱零落在地玄微子指而泣曰其嗜利則孟子所以惡交爭也其欲速則仲尼所以悲不達也孰有輕命若糞重賄如山用一縷無繼之力涉萬仞不測之川踐險冒危既蔑履冰之誠殞身覆族空銜沒齒之冤弘農子聞

其言同其歎此則以江以湖沒不可援今復有非波非
濤溺不可算窺之則茫然無岸由古及今陷者如貫玄
微子矍然其詞泣然其悲何陸之為溺而不維不持紛
吾緒而亂余曲爾其辨而折之乃曰麴蘖是惑沉湎無
時混淆先後顛倒矩規唯誕是習莫禮是持散髮裸體
以遨以嬉汨親踈兀尊卑情所至則至意所為則為可
慶者忽其慶可悲者忘其悲龍章莫保鳳德何衰光逸
則狗竇求入伯有則壑谷忘歸子反不謀於軍前敗非

天作正平不拘於席上禍乃自貽但驕其氣益亂其機
隋兵濟江玉樹方舞越人入戶金箏猶飛所以爲酒之
溺也至若貝含其齒雲聳其髮苞藏其戾矜持其妍攻
巧若拙移曲成端爲媚斯極荷寵益堅陳靈以相服戲
朝俾君臣受禍驪姬以歸胙獻毒使父子成冤齊莊以
盜室取斃却孽以奪儷不全此所以爲色之溺也至若
伊義莫顧唯賄是務以諂以回不軌不度溝壑難滿錐
刀必聚莫興知足之慙蔑有惡盈之懼其帑溢其帛靈

其貫朽其粟腐營營尚恐其力窮汲汲不思其日暮復

有白版為侯黃金作輔南宮變屠賈之行西圓

疑作

成

闐闐之路求金求劍曾無就木之心驚爵驚官但欲齊
天之富士夫死而方覺雍子戮而未悟此所以為貪之
溺也至若專國之柄操天之軸任其情性隨其嗜慾其
喜也沉者浮其怒也羸者縮易否為臧化直為曲雖山
重而可迴雖海深而可覆其門若市其帑如谷背者斥
向者錄言張其機笑孕其毒譽之則銖而為鈞訾之則

歌而爲哭屏內外之氣側天下之目稽其莽卓考其產
祿謂兵鈴之在己將神器之有屬國璽行竊弄之手宮
闡開盜視之目自謂其投蓋之力可圖殊不知燎原之
火難撲既衆叛而親離竟噬臍而齧腹此所以爲權之
溺也是四者匪橫其流匪駕其舟有溺者孰究其由其
毒也必漬於骨髓其痛也亦甚於戈矛雖扛鼎之力觸
山之酋亦不能杼之以出而況於織離之儔哉玄微子
乃曰始吾觀涉水而溺則悅然而內惕今復聞不波而

沉則瞿然如大敵且酒不可甘甘之則沉吾命酒曰甘
波色不可愛愛之則溺吾命色曰愛河衣所以被體食
所以充腸苟朝晡而不置寒暑而有裝豈假積粟於廩
儲貨於囊且藥所以攻百疾百疾蠲而藥不止者鮮不
及其殃吾命財曰藥江士患不達之名不立之身苟達
苟立在守其真何必競升沉之路爭輕重之釣狼子野
心暱之害人吾命權曰狼津噫生於世不溺於四水者
吾謂夫顏閔之倫

文苑英華卷三十七

欽定四庫全書

文苑英華卷三十八

宋 李昉等 編

水七

冰賦二首

冰泉賦一首

初日照冰池賦一首

冰池照寒月賦二首

冰將釋賦一首

冰泮曲池賦一首

履春冰賦一首

冰賦

陸 環

大哉洪鈞賦象觸類而生或分氣四序配位五行惟彼
冰之堅質包履霜之漸成夫其體含上善色侔晴雪妍
媿自明表裏虛澈原其物也則昏危應位覘其時也則
玄冥御節陰氣盛陽晶滅殺氣鴻洞嚴飈栗烈當此時
也何水不凝何潭不結瞻山則萬壑俱閉歸海則百川
潛泄諒造化之自然羗難得而備說佳其空冷愈堅風
淒益壯汗漫稜層委積亭嶂交河則戰士加守合浦乃
漁人迷望况乎天道無私所應多姿雲禽下覆彰后稷

之聖德泉魚出躍表王祥之孝思然而題周官順時令
皎皎雪聚皚皚山淨盤重澗而疑壁瀉圓池而若鏡與
海鏡而混輝將玉壺而相映何層氷峩峩形埋奔浪勢
壓衝波坎位臨時則慎於馬窟離光再誕示合於溲沱
豈直若斯而已哉固見美於將來其藏之也黑牡秬黍
以享候其出之也桃弧棘矢以除災取順則人不夭札
用逆則時多震雷故以北陸而收西陸將啓冬鑿秋剗
識寒暑之情大盤夷盤表君臣之禮徒觀其謙也每避

燥而就濕其讓也亦背陽而向陰偉何點之入喻著幽
詩而見欽皎爾自安同達人之守節渙乎將解若天道
之無心故先賢取危於履薄作戒於臨深或曰衆雖類
而多名曷方茲而至妙明陰陽之本爲適時之要可以
羞之於王公可以薦之於宗廟儻水鏡之一察猶希暫
於迴照重曰深山窮谷凌人鑿頌賜從來天下聞別有
川池捐棄者終思采斲獻明君

第二

劉長卿

水無心而清冰虛已而明始則同體終然異名水之動

我變以靜水之柔我變以貞任方圓而能處其順在高

下而不失其平北陸初凝結而為冰東方始起融而為

水與時消息一作合散隨物行止水也不一作莫知其所然冰

也不知一作莫分其所以何推運而有恒乃忘情而合理觀

乎外示貞堅內含虛澈一作澄澈無受染一作無染塵能保其素

無一作不納汙以一作能全其潔比玉而白不為蠅玷一作點

比月而明不為蟾缺瓊樹色奪瑤池光發變寒日三字一作

寒日之清瑩帶陰天一作陰之肅殺爰自止水遍於山

為大一作川山一作穴俱閉長波寂然皎皎彌靜莪莪遠連

如雪覆地若雲被一作天雲之凝兮佇長風而可掃一作

拂雪之積兮向太陽而莫全豈同夫氣之所感物莫能

遷勁飈夕寒我力增壯晴一作景朝暖我心一作猶堅

其堅伊何履霜斯至其薄伊何臨泉是畏君子用之以

馴致其道覩之而不驕於貴一有者二之日始鑿命虞

官三之日始納享司寒一有四之天子陳禮容賦豳風

日三字

大啓冰室獻於王宮氣肅雲陞寒生袞龍闢九門於月

下列千官於鏡中頌聚一作衆位取飲以受命御至尊得

象於朝宗若君莫之求臣莫之見則深山窮谷詎可得

而加薦苟藏之不周用而不徧則災霜害電如有待而

爲變人或愛我二字一作好下同清人或愛我淨既潔其跡亦

堅一作虛其性水之冰生於寒人之冰生一作出於正無一作

不棄其道吾將何病 凡一作皆集本

冰泉賦以應陽氣而發蒙爲韻

陳廷章

衆潤將行一陽初勝剛柔合德遠近潛應動能依節自
契周書之言流未入淇豈若衛詩之興時也蓋氷填井
甃日冷池塘暫無聲於短景終有驚於靈長於是微消
涸涸稍變潛藏既聞乎下能順上豈聞乎陰不承陽深
且異於潢汙孰云咸竭用堪和於酒醴誰見必香居壅
鬱而將聽聲潺湲而尚未雖幽深之可則終遠大而爲
貴未知所適願添滄海之流必得其宜無俟黃鍾之氣
澗澗如彼清泠注茲其道也誠於遠矣其深也可以述

而望朱夏而龍文生定四時而不惑當玄冬而麀角解
後五日以為期暗漾懷珠之媚潛抽漱玉之姿鄙借勢
而為瀾每遇秋風之冽冽待流聲而解凍必由春日之
遲遲全其性以守柔相其時而忽越思玉溜之纔吐若
岷江之初發出陽岸之下潛潤澗毛涌陰溪一作之中
輕搖石髮決諸可見其澹淡冽彼詎同夫汨滑巽雷驚
之蟄猶若陸沉當治疑理之時不虞乾没當今化源畢
啓時令皆同覩陽光之下達昭帝澤之潛通浮帶地之

功暫留坎窞運知天之德終異童蒙儻或導於外發其中冀有裨於江漢得流善於無窮

初日照冰池賦

以鮮彩明澈寒光入座爲韻

馮宿

日生東方冰滿池塘以涸沍之寒質承亭曈之曉光其象斯潔其容可閱炳爾昭渙朗然澄澈可愛之德已聞左氏之經如履之心更憶詩人之說即合體而光輝且負暄而昭晰全啞嶺北之梅詎比墻陰之雪美其林煙早晴寰宇淒清池有水兮冰合天無雲兮日明凝陰尚

積暖氣潛盈淋漓兮向陽和而未泮皎潔兮覩津潤之
將生所謂當此嚴景昭茲陽彩上下相融貞明共在斯
乃元化所結玄功不宰日有曜而必臨冰無心而有待
不然何大明兮方懸凝質惟堅斜景自高而來照素耀
相向而俱妍曲岸增媚平沙更鮮豈西陸之中候朝覲
而方出東海之上泮陰火之潛然是知清興攸集氛埃
不入隨陽而孤鴈初飛向暖而羣鷗乍立且日者分乎
兩曜冰者生乎沍寒既清貞而可賞信溫煦之咸懽足

使勵志求鑿探幽就觀何必挹瓊漿於丹竈思夕露於
金盤曷若色映朝戶光陵曉座氷生池上豈羨玉壺之
明日下池中全遇隙駒之過聊賦之以體物庶同白雪
之難和

氷池照寒月賦

以寒淨光潔
瑩心目為韻

林藻

瑤池洞澈兮堅氷始攢玄天皎晶兮皓月初團氷含虛
以淒冷月委照而光寒既合體以凝質故清輝而可觀
爾其氣肅而勁色虛而淨俯視則湛若玉壺仰觀則爛

如金鏡履之者可以慎其矩步翫之者可以滌其情性
嘉乎清熒旁達瞳矐交映間樓臺則素色彌分出河漢
則清光寥曠良吏觀我以思飲墨客覽我以興詠懿夫
鑒照無隱盈積有方纖埃翳而必見衆象照而難藏晃
兮奕奕耀兮彰彰奪銀河之曉色掩水鏡之秋光于時
羣動已息寒夜未央微雲度月以澹蕩細影拂池而悠
揚晶耀兮環林之際朗練兮孤亭之旁月周天兮有虧
池擁冰兮難決月在則光瑩月沉則光滅彼冰也非無

自然之色我取映月而增潔此月也非無自然之光我
取籠冰而加澈斯乃以淨臨淨不瑩自瑩精氣交而上
浮光彩融而入暝夫如是至人遇之而暢襟貪夫對之
以勵心豈徒皎皎然罔象炯炯爾照臨而已哉向若月
隱西峯冰藏深谷焉得解吾人之昏滯悅志士之心目

第二

同前
韻

王履貞

至矣哉立冬之季茲池可觀臨方塘而霜容既肅照圓
月而素色兼寒凝為水碧淨若琅玕迫而窺乍驚飛於

繞鵲俯而察寧失顧於迴鸞若乃日暮雲晴蒼然色正
水彩旁射蟾輝下映的皦兮地布明璫瞳矐兮天垂朗
鏡則雖隨侯之珠皎而潔和氏之璧光且淨曷比夫動
資文士之興載悅吾人之性觀夫寒空若畫清漏且長
透珠簾而庭戶增媚浮玉樹而園林借芳攬之則無誠
偶形於顧兔視之若有徒積素於飛霜故能潔通宵之
寒氣凝徹底之清光既而空色相鮮餘華昭晰嚴風吹
而不散沍陰生而轉潔偏使閨婦增思征人愴別望隴

上之嬋娟怨池中之凜冽又能使空門禪客除昏滌瞋
對之而虛白生襟觀之而神形自瑩嗟乎時之革物物
感人心俾閒放者取而適性勤苦者對以愁吟則知冰
月之宜靡極沿變之趣彌深原夫幽院添池晴峯繞竹
幾處堪賞千般寓目加之以清冰素魄復何媿深山窮
谷佇月令之必賦冀同出乎西陸

冰將釋賦

以和風既至遲
日初臨爲韻

侯喜

春入寒水冰驚淺潄照遲遲之早陽色將無定度習習

之回吹勢欲難任渙若分彩濡如在陰如應勾芒之節
將成老氏之心非其漸焉何以知仁氣之徐至不曰釋
也何以表陽光之有臨稍露沙痕似分苔翠在形開而
可觀因罅發而增媚動其中矣將有日而然開必先焉
若知風之自澹引晴色洞含春意曩之能久曾殊見睨
而流今則不堅轉失履霜之至當歲華之既好變水綠
之云初暗轉而光搖已薄輕流而影動惟虛觀夫宵以
泫泫晝必徐徐淨以當融稍驚北徂之雁輕而未散猶

觀上越之魚如此則消積凍發微波西陸當出東風已
和湛兮而平劔開幽匣默然而運雲歛晴河方催皚皚
之白漸滅昭昭之多則知道貴無質我之釋兮以日不
徐不疾與真源匹政尚得中我之釋兮以風洩洩融融
與皇澤同事有可貴用非可既懼乎裂尚保質於地寧
就其流始收光於神氣潰然當解熙哉此時幸照臨之
必及豈開泮之云遲日已不寒正難於鳥覆數當有盡
轉使於蟲疑吾亦慕斯冰之不擇不知所以裁之

水泮曲池賦

以春日風暖
之候為韻

王起

玄英變律青陽報春伊曲沼之方燠始水泮於斯辰北
陸初凝惜莪莪而色閉東風忽解驚片片之光新所以
將延軒騎稍媚咸秦散亂瓊岸離披玉津開碧潭之漾
漾如白石之磷磷豈必積窮谷而與競塞長河而見倫
則知煦嫗有待沍寒無必將辭烈烈之風漸映遲遲之
日或竹破而瓦裂或鏡華而玉質帶宿草而猶霑添新
泉而更溢小大惟錯方圓不一臨深之戒稍窺履薄之

危漸失蠶之績也必見其淪胥鯉或感焉匪勞於剖出
瑣錯騰外淋漓積中隨波響激遵渚光融下魚竿而不
隔泛仙舟而已通渙渙初流自同夫溱水沖沖罔鑿奚
取於函風是知冰在池而合散池與冰而虛滿腹堅難
俟於星迴磔裂必因乎風暖皎潔不私清明在茲殊玉
壺而覩止異凌室而藏之鼠無德而潛伏狐由是而決
疑和而不同始堅然而固節積而能散終渙爾以隨時
客有覽名都之秀盼迴塘之溜知迷津而可通在解凍

之斯候

履春冰賦

以戒慎之心如履冰上為韻

陳 崧

履道有本戒之在冰每翹翹於進守如凜凜之不勝累
足有懼旁行可矜識安危之在德豈顛越之或承不敬
其心敢徵所以本之於有既漸乎履霜戒在不虞罔輕
於狎水方保心於慎獨焉敢測乎涯涘人之所畏豈造
次而可忘道之將行非中和而勿履敗或聞於旋踵義
無輕於舉趾不處其薄君子之行固然若居下流詩人

之戒深矣其始也陽律掩耀陰飈戒時因潤下而生德
由寒沍以成姿皎若澄虛而體合上善冥然沉響而跡
不能欺苟戒之而不履是以履之而不疑事異涉漆匪
裳之褰也德猶如羽知行可蹈之則知視險無必素誠
可諒固違日慎之心無易春冰之上投足而衆流不測
委順而中懷是廣怒焉如擣知大患之在躬生也若浮
敢憑虛而用壯孰曰堅乎匪同介如結寒波而暫聚湛
清質以含虛恍若有亡似乘空於月宇退然如失猶奉

身於玉除且異夫莫來莫往何遵於匪疾匪徐必若懷
以勵貪飲以明信如臨之戒如履之慎則知水德可保
冰力可任匪冰不薄匪水不深彼之蹈者委乎足我之
蹈者本於心又焉能料其薄厚而計於升沉則執德罔
愆持危不戒意平澹之可翫在清夷之可懷豈知蹈之
有道行之在德而忽乎淪溺之敗

文苑英華卷三十八

欽定四庫全書

文苑英華卷三十九

宋 李昉等 編

水八

玉壺冰賦一首 冰壺賦二首

漢光武渡滹沱冰合賦一首

履薄冰賦二首 履霜堅冰至賦一首

藏冰賦一首 開冰賦一首

東風解凍賦一首 陽冰賦一首

玉壺冰賦

以堅白貞虛作人之則為韻

壺至潔玉至鮮有若君子清標儼然色澄澄而外澈質
規規而內圓月出皎兮入夜而其儀難見冰以風壯處
寒而其實逾堅諒負竒而可玩超眾器而為先當其韶
光幽山韞耀窮石隱榛蕪而懷寶淪泥滓而藏白如虹
之氣雖無謝於雲煙抵鵲之鄉常見儔於瓦礫於是卜
生見而神動匠氏聞而心惜乃奮剖刻耀精明以玉之
美作壺之形信無瑕之可用若不琢兮何成以虛而受

達人侔其弘量以明而鑒志士効其清貞若其稟性温
如作器含虛正色則惟珍是務立操則匪貞不居爾乃
嚴氣凝玄陰作寒飈一振具物寥索川晶晶以凌滿林
稍稍而木落日既暮兮金闈寂夜一寒兮玉壺陳素冰
滿腹清光照人臨象筵而色媚入金鏡而影新對之者
暢慮觀之者清神能勵貪夫何假盤盂之戒有同儒士
長爲席上之珍是以隨珠奪魄趙璧慙姿珊瑚璉之器斯
實爲之美人曾不足方其皎潔錦衾亦安敢誇其陸離

偉夫掩物之美比人之德素其表兮其儀不忒實其中
兮秉心淵塞伊烈士之指南固賢人之軌則

冰壺賦

以清如玉壺冰何
慙宿昔意為韻

陶翰

惟冰也有堅凝之貞惟壺也有虛受之明謝周流之弱
質託鎔鑄以成名直方任器規圓愜情對光輝而比色
因擊扣而馳聲冰假壺以為用壺含冰而轉清及夫懽
呈朝晏之餘瑞表經綸之初尤荀吳之失對陷王霸之
後車既遇賞以為樂乃獲成於所如但觀夫推移在道

澄澈如玉時見瑩而則明或將摧而不曲故曰冰貴於
水噐尊者壺國因時而必用軍每擊而何虞若乃周將
酬客魯欲藏冰揖籍父其何忌顧申豐而可憑是以用
之者廣須之者多遇薛鼓而擊誦幽詩而何至時冰銷
滴潤壺罄成酣乃挾纊以荷德豈知漏而興慚昔者趙
衰從徑魏主其逐雖有餒而仍携顧無麋而未宿每覽
餘軌當思踐迹志未吐於平生容已衰於疇昔儻開冰
之可薦庶投壺而無數况霜空且寒晚景仍墜雖杼軸

而不輟猶髣髴而無記將投皎潔之姿願假含容之意

第二

同前韻

崔損

炯乎太陽之精玉有真質冰則貞清我君子象諸溫如
皎如正其色兮匪真不克峻其節兮匪貞不居爾其製
盤盃訪結綠瞻白虹之氣詠生芻之束乃賦于他山攻
此良玉剡之成器錯以成壺信以旁達忠不掩瑜以虛
而受用當其無及乎嚴律閉陰氣升氛霧結河海凝沙
驚鴈塞雪滿峻陵於是天景初夕玉壺始冰臨象筵而

孤映對金鏡而相澄爾其淋漓未泮溫潤而瑳纖光不
隱毫末不過豈爾瑕之可匿玷之可磨不然珉之衆矣
貴玉者何心之潔矣飲冰則那莊氏寓論宣父式談夜
光奪魄明月懷慚豈比夫立槩生操激清勵貪伊至人
之比德同貞士之司南夫以物象所鑒精明所蓄霜華
晨清月影寒宿故覽之者魂竦憑之者慮惕迨北風之
已壯幸西陸之未覲客有撫而歎曰猗歟猗歟吾無是
易且漏卮無當兮歎諸古大圭不琢兮聞諸昔昌若茲

器之可佳諒君子之弘益然後宣其烈替其意抽毫命
簡賦冰壺之盛事

漢光武渡滹沱冰合賦

以上天無親惟
德是輔為韻

獨孤及

昔漢光武收河北之年馳馬將進滹沱在前為敵所迫
當冰不堅及軍裝隱鱗以登岸殺氣崢嶸而塞川意者
欲定神器於茲日彰聖人之動天若非使不道者畏有
德者王則水不能以造次而結冰不能以斯須而壯變

浩浩之流爲峩峩之狀擁高旌以進雷長轂以上及企
路以全軍又迎風而破浪于時進隔關于長津顧邀遮
其後塵患勢莫之敵沒不可振求一徑而莫遂惟羣臣
之不親賴王霸至誠之力協光武至聖之德人從悅已
之詐天贊勤王之直故得舟楫不設衣裳不濡避地以
往乘冰以趨一水之上兩軍相殊使後人視水則有求
冰則無望飛塵而惆悵對寒流而踟躕由是知天人之
合發與神祇而相符不然則何以延十二之祚總四七

之輔滅新室毒流之日作漢氏中興之主受命之瑞也
亦何異玄女降於軒轅白魚躍於周武

此下未見
惟字官韻燕趙

之間清流瀾瀾高風以遠遺躅於是

履薄冰賦

以戒慎之心如
履冰上為韻

皇甫湜

冰之積也不厚人之履也難任此馬投足可為寒心彼
墊溺之攸慮在恐懼而誠深慎同數馬之人然非萬石
誠若倚衡之子不以千金水始凝冰未壯乏六尺之為
厚非七月之所尚螽斯之股兮猶且不同齊人之紈兮

曾無以况雖鞠躬而欲涉何跬步之能抗有同居累卵之危無殊坐積薪之上股慄兮在茲魂驚於所之怵惕求前豈人心之難測趨趨有畏類狐性之多疑每縮縮而若墜常兢兢而自持與巢幕兮馬比將臨泉兮是擬丈夫不處斯畏其沒身夫子所懲不惟於滅趾徐子忘其故步尚書越其素履行自失於佻佻烏無施於几几視之豈無履而若虛非北陸積堅之始是東風所解之餘水蟲隔而纖鱗必露秋蟬比而輕翼不如當履道未

成其難汙濟縱善行無跡不可躊躇兢慎圖其不敗震
懾謂其將壞步搖搖爾式彰君子之行身飄飄然誰謂
邑人不戒如何克已若此履冰與習坎而相類符執玉
而可懲故疊足是虞側身以進言忘足履之適自近廉
隅庶藏心腑之中無貽悔吝得過隕易危之吉靡濡首
失容之釁行之止於三思戒實先於六慎

第二
韻同前

冰之薄兮消釋可期人之履兮憂患是持將秉心於處

險諒投足而增疑故君子假輕重之喻為安危之資跬步未移顧見吉凶生矣躊躇欲泮行觀左右流之是以義比垂堂戒同狎水乍兢兢而股戰時刻刻而屢起步難免於褰裳憂有甚於濡履則知吉凶繫乎物動靜由乎已不敢不踏雖厚地而莫安時止時行固輕冰之可以故知我者見我戰戰兢兢不知我者謂我視川若陵既無咎於素履尚可期於積冰或北陸初結或東風始興觀之也知其脆易破涉之也恐其任不勝由是屏氣

而行虛心而進在陽敢思乎不治

海賦陽水不治

通陰庶懷乎

克慎身若重於千鈞冰疑銷於一瞬憂心展轉危步虛

徐空色不分每疑於滅趾冰容無響或遠於曳裾將釋

兮畏明君之渙若其行也懼大易之屯如然則觀薄冰

之爲象知立身之所尚類將墜於焦原之前如待燃於

積薪之上始玲瓏而若盡復皎晶而可望就其淺玉石

無以隱其輝臨其深魚龍不能掩其狀大矣哉其薄斯

在其虞則深將以戒乾乾於終日持惕惕之小心當見

睨而或躍懼霜霰之未任故曰古之機言今之攸戒儻
所行而不惑俾處薄而勿壞

履霜堅冰至賦

以君子之道闇然而日章為韻

王起

霜之履兮白商應冰之堅兮玄律分其履也結之寒露
其堅也矗若長雲當萬物始挫之時降於青女及六尺
凝寒之日可薦明君信履微而至著宜布象於前聞乃
若歲如何其夜亦秋止稜稜稍結兢兢未履漸皚皚於
葛屨之下將皎皎於玉壺之裏雖嚴凝作氣必納於輿

人而愴悽動容先感於君子此謂履霜之始暨夫變化
無朕堅剛有期律移緹幕之候辰當黑帝之司由是璫
璣無積清明自持則豐山古鐘不舂容而鳴矣鄴臺舊
井可皎潔而藏之此所謂堅冰之時也霜之飛兮至微
冰之潔兮自保所以通變其德所以馴致其道畜我
之色且寒於長河改靄靄丁頰反
早霜也之光寧留於勁草凝
冷兮漸滋積素兮斯瞰始落金波之上有助其明終藏
陰室之中不欺於闇冰因乎厚地霜本乎高天何質變

而增勵何節窮而更妍亦由洪因纖起高以下先投一
跡而千里路極覆一簣而九仞功宣則求己者知霜冰
之言理有漸周身者知霜冰之防於未然固宜研精屑
屑覃思乾乾豈翫蒨葭蒼蒼之色鑿山谷沖沖之堅哉
士有錯綜文房琢磨儒術以脩詞爲履霜也 不同於豺
祭之辰以干祿爲堅冰也 不同於狐聽之日願察言而
觀行儻循名而責實况乃良牧煌煌近天子光引凝陰
之義爲勸學之方則因卑致崇匪一朝一夕爲大於細

在日就月將然後知作者之微旨嘉言孔彰

藏冰賦

以堅明潔
鏡為韻

張皓

國之造物時惟用天履在歲之窮紀知層冰之腹堅可
以備用凌人主馬羞拒忝以為薦率司寒而是先於是
入坎窞踰崢嶸乍逼側以經險復趨趨而不征爽氣旁
達凝陰上清始峩峩而不見遽沖沖而有聲是伐是取
登乎上京候朝風而益壯對夜月而俱明崇凌既啓陰
井方潔含玉色而轉深拂霜威而逾潔不剝不剝如磋

如切掩下方以涸沍匪上騰之發泄方見象於爲寒且
多驚於內熱顧惟不佞括結成性彼蓄物以俟用亦何
異乎藏冰將有冒於嚴凝豈見遺於水鏡

開冰賦

王起

國家順仲春之律開藏冰之室將以均寒暑分老疾北
風始壯且納於必周西陸有期因用而斯出是時木德
司辰條風報春物惟求舊令乃謀新有頒冰之職有伐
冰之臣安得深藏於重壤自當登御於一人有司奉明

詔一作誠薦清廟啓其室觀其徽連鍾既下不作冲冲之

聲厚土忽開已發莪莪之照獻羔之禮既宣祭韭之義
克全將使陰不伏陽不愆詎有東風之解莫移北陸之
堅皎潔兮玉壺乍奪清瑩兮金鏡爭鮮鑿乎其中雖臨
深而履薄積于其外終岳峙而峯連此輿人之所納縣
人之所傳乃祓以桃弧升於蘭殿凌陰去而寒盡御座
來而春變其爲利也溥其爲用也徧羣寮是錫足以表
鴻恩百祀方脩足以成嘉薦向若藏之不以宜啓之不

以時自然光而不耀貞以自持同土石而棄矣何賓祭
而用之德既自此宣政亦自此審禦霜電以清沴調風
雨而成稔開五色之瑞福應方來叶七月之章頌聲曷
寢豈惟求履霜之堅思積水之凜冰之開也在於人冰
之用也進於君昔時司寒雖蒙於幽閉今將清暑終見
於區分儻不遺於茲日期不掩於前聞

東風解凍賦

以立春之日冰凍銷釋為韻

韋 充

三陽布萬物新攝提建月勾芒御辰惟東風之解凍明

下土而知春於是嗣木德遊水濱折涸沍開奔淪始自
震而發跡終習坎而成仁原夫其始也出大塊乘新律
度暗川經煖日積習習之淑氣散莪莪之素質順流而
委想銀河之漸傾逐吹以分訝瑤池之漸失飄然既至
颯爾攸興潛融積溜暗斷輕冰自太簇氣生功因入律
悅中流而瓦解聲若裂繒不疾不徐如考如擊動輕漸
於皎潔上遊鱗於磧礫未分蘋末疑馮夷之剖蚌胎稍
辨波心若荆山之流玉液意同攻陷勢若剗剔何虎嘯

之威方微信狐疑之心已釋羊角既止蟬翼潛銷表一
歲發生之候當三春啓蟄之朝鼓怒斯至徘徊遽飄圓
折之時初疑破鏡亂流之處盡若迴潮斯以見寒暑不
憊推遷屢急何一氣之自噫信百川而皆及尊仁為煦
決滯之義則深以德而和陷堅之功斯立當其晴流漸
泮麗景初馳飄忽既及疑滯無遺狀曉河雲卷之初忽
其明矣若太素氣分之際難可辨之是知天地既春忻
榮者衆將以遂於羣性不獨釋於積凍然後驅飛廉命

羲仲俾風日之可遊冀臨川而必中

陽冰賦

以海上沙前光
耀清景爲韻

林滋

考庶物於朱垠得陽冰於碧海託巨浸以潛結泛驚波
而長在堅乎自得羲羲之素色寧虧渙若無虞皎皎之
清光詎改始其孕太陰之精因積水而成勁颼颼之遠
吹澄滉漾之餘清別浦宵凝孤聽之聲乍絕迴汀曉合
蟲疑之質俄生絲是外肅重溟中分萬景滄淵掩巨蚌
之魄碧落奪寒蟾之影幽疑玉樹露皓氣之皚皚淨若

銀河亘秋光之耿耿既叶數九寧將屢遷乍整洪濤之
末時明綠岸之前不解東風諒難資於履薄非藏北陸
復何患於攻堅炎炎之畏景雖臨冽冽之寒威益壯嵩
輝想冰始之日洞徹得夏頌之狀鮮飈乍觸無慙於雲
母屏中纖翳不生曷愧於琉璃地上淨拂霜影輕籠月
華稟質苟因於涸沍分形詎委於泥沙既異在陰彩射
鮫人之室非同向晦光寒漁父之家至若浪息遙川煙
收遠嶠燦晶鑠野以增熾皓色澄空而引耀清含上善

曾無泮渙之期素激中流豈憚赫曦之照所謂出自靈
長居然異常苟惟貞而是守雖盛暑其何傷亦由抱素
者絕陷已之患履道者為終身之防幸消釋之無日庶
永託於朝光

文苑英華卷三十九